

**MAHINUNG DANONG MGA PAMAHAYAG
ALANG SA 2025 THANKSGIVING BLENDING CONFERENCE**

**Ang gikinahanglan nato karon mao ang takdo-sa-panahon, dihadia,
ug buhing panan-awon sa langitnong Cristo nga buhing bituon.**

**Ang praktikal nga Emmanuel mao ang Espiritu sa realidad
nga mao ang presensya sa nahingpit nga Tulo-usang Dios sa atong espiritu;
kanunayng nag-uban nato sa atong espiritu ang Iyang presensya,
dili lang adlaw-adlaw kondili matag gutlo sab.**

**Naa sa Mateo 28:19 ang labing tin-aw nga pinadayag sa Diosnong Trinidad:
“Busa panglakaw mo ug himoang tinun-an ang tanang nasod, magbautismo nila
ngadto sa ngalan sa Amahan ug sa Anak ug sa Espiritu Santo.”**

**Dunay duha ka dagkong prinsipyo sa uniberso—
ang pagbulot-an sa Dios ug ang pagsupil ni Satanas;
may kalabotan sa pagbulot-an ang bugtong panagsumpaki
tali sa Dios ug ni Satanas.**

**Mga Talamdan sa Mga Mensahe
alang sa Thanksgiving Blending Conference
Nobyembre 27-30, 2025**

**LINANGKOB NGA HISGOTANAN:
ANG MALANGKOBON-SA-TANAN NGA CRISTO
INGON SA GIPADAYAG SA MATEO**

Mensahe 1

**Ang Takdo-sa-panahon, Dihadiha, ug Buhing Panan-awon
sa Langitnong Cristo nga Buhing Bituon**

Basahong Kasulatan: Mat. 2:1-12; Num. 24:17; Gen. 1:14-19; Dan. 12:3;
Bug. 1:16, 20; 2:1, 28; 3:1; 22:16; 2 Ped. 1:19; Gen. 22:17; Jud. 12-13

- I. Human mahimugso si Jesus sa Bethlehem, nangabot sa Jerusalem ang mga mago gikan sa silangan, nga niingon, “Hain man Siya nga natawo nga Hari sa mga Judio? Kay nakita namo ang Iyang bituon sa pagsilang niini ug nanganhi mi aron mosimba Niya” (Mat. 2:2); katumanan kini sa Numeros 24:17, nga nag-ingon, “Dunay mogula nga Bituon gikan ni Jacob”; nagpasabot ni Cristo kining Bituona:**
- A. Wala moingon ang mga mago nga, “Nakita namo ang *usa* ka bituon,” o “Nakita namo *ang* bituon,” kondili, “Nakita namo ang *Iyang* bituon”; ang Bituon mao ang langitnong Cristo.
 - B. Gipakita ngadto ning makinaadmanong mga tawo ang bituong gihisgotan sa Mateo 2:2; wala kini mopakita kang bisan kinsang tawo sa Israel; samtang dunay Kasulatan kalabot ni Cristo ang mga Judio ug nasayod asa Siya ipanganak (vv. 4-6), nakita sa mga mago ang bituon ni Cristo.
 - C. Nahibalo ang mga Judio sa nasulat kalabot sa dapit diin ipanganak si Cristo (Miq. 5:2), apan nakakita sa buhing panan-awon kalabot Niya kining makinaadmanong mga tawo gikan sa silangan; sa kapulihay, gidala sila sa bituon sa dapit nga nahimutangan ni Cristo (Mat. 2:1-12).
 - D. Si Cristo ang tinuod nga Adlaw (Mal. 4:2), apan sa pagkatinuod, dili Siya mopakita ingog Adlaw sa panahon sa gabii; mosidlak hinuon Siya ingog bituon (Bug. 2:28); mosidlak ang bituon sa gabii, apan nagpakita kini nga moabot na ang adlaw (Rom. 13:11-14).
 - E. Sa pag-anhi ni Cristo sa unang higayon, dayag Siyang nagpakita ingog bituon, apan inig-anhi Niya sa ikaduhang higayon, Siya ang bituon sa kabugason (Bug. 2:28; 22:16) ngadto sa mga mananaog Niya, nga nagtukaw alang sa Iyang pag-anhi; alang sa uban mopakita si Cristo sa ulahi ingog Adlaw (Mal. 4:2; itandi sa Mat. 13:43).
- II. Gipadayag sa Mateo 2:1-12 nga buhing butang ang pagkakaplag kang Cristo; dili kini kalabot sa kahibalo lang sa doktrina sa Biblia:**
- A. Nipakita ang bituon layo sa templo sa Balaang Yuta, layo sa sentro sa relihiyon sa mga Judio, layo sa mga sacerdote, mga escriba, mga Fariseo, ug sa tanang relihiyosong tawo; duna hinuoy bituon nga nagpakitag iya ni Cristo didto sa paganong yuta.
 - B. Dili magpulos kanang magkupot lang ta sa Biblia ug mobasa sa Miqueas 5:2, nga nag-ingon nga mahimugso si Cristo sa Bethlehem; duna tingali tay Biblia, apan dili tingali ta makakita sa bituon.

- C. Ang bituon mao ang buhing pinadayag, ang buhing panan-awon, dili ang daan ug patay nga kahibalo sa doktrina sa Kasulatan, dili ang patay nga kahibalo sa Miqueas 5:2; ang gikinahanglan nato karon dili kahibalo lang sa Biblia kondili ang langitnong panan-awon, ang takdo-sa-panahon nga dihadihang panan-awon, ang buhing panan-awon, ang panan-awong dili gyod ikatudlo sa tawhanong mga pangagpas.
- D. Bisan pag nahibalo ta sa Kasulatan, gikinahanglan gihapon nato ang dihaduha, takdo-sa-panahon, nga buhing bituon nga mogiya nato sa dalan mismo ug sa balay mismo nga nahimutangan ni Jesus.
- E. Human makadawat sa buhing panan-awon, nasaag ang mga mago tungod sa tawhanon nilang pangagpas ug nangadto sa Jerusalem, ang kaulohan sa nasod sa mga Judio, nga gituohan nilang nahimutangan sa hari niini; ang pagkasaag nila maoy nakaingon sa pagpamatay sa daghang batang lalaki—Mat. 2:16.
- F. Sa pag-abot nila sa Jerusalem ug nangutana kon asa ipanganak ang Hari sa mga Judio, niingon ang Kasulatan nga “sa pagkadungog ni Herodes nga hari niini, nasamok siya ug ang tibuok Jerusalem uban niya”—v. 3:
1. Sa pagkadungog nila ning balitaa, magkalipay gyod unta sila; nasamok hinuon sila; walay laing hinungdan niini kondili kana rang dili sila tinuod nga nagtinguha sa Manluluwas—itandi sa Prov. 4:23.
 2. Kon ang tawong nituo sa Ginoo dili matandog Niya nga gugma sa iyang mga pagbati sa sulod, dili siya takos nganlag Cristohanon—2 Tim. 4:8; Mar. 12:30; 1 Cor. 2:9.
 3. Ang Cristohanong naglaom nga mobalik ang Ginoo o naglaom ba nga malalin mag-isip gyod nga pasidaan kini—2 Tim. 4:8; Tito 2:13; Bug. 2:28; 22:20; Mat. 24:40-44; 25:8-13.
- G. Sa nakorihian na sa Kasulatan ang mga mago (2:4-6), nangadto sila sa Bethlehem (vv. 8-9), ug nagpakita na sab nila ang bituon ug gigiyahan sila sa nahimutangan ni Cristo, “ug sa pagkakita nila sa bituon, nalipay kaayo sila sa hilabihang kalipay” (v. 10):
1. Sa nakorihian na sa Kasulatan ang mga mago ug nabalik sa hustong dalan, nagpakita na sab nila ang bituon; mag-uban gyod sa Kasulatan ang buhing panan-awon.
 2. Ang mga sacerdote mao kadtong nanudlo sa mga tawo sa kasugoan (Mal. 2:7), ug ang mga escriba mao kadtong nahibalo sa Kasulatan (Esd. 7:6); pulos sila nahibalo bahin sa pagkahimugso ni Cristo (Mat. 2:5-6), apan lahi sa mga magong taga-silangan, wala sila makakita sa panan-awon, o duna bay kasingkasing nga magtinguha ni Cristo.
 3. Bisan unsa pa nato “kasubay sa Kasulatan,” kon mawad-an ta sa presensya sa Ginoo, hingpit gyod tang sayop; ang paagi sa Bag-ong Tugon aron makakaplag ug makasunod ta sa Ginoo mapadayonon mang pagpabilin sa natago nga presensya Niya—Juan 5:39-40; Isa. 45:15; Exo. 33:11, 14; itandi sa 2 Cor. 5:16.
 4. Sayon ra ang pagpundog kahibalo sa Kasulatan, apan kon buot ta nga dunay buhing paggiya, magkinabuhi gyod ta nga suod nga nadugtong sa Ginoo; kinahanglang mausa ta Niya—Mat. 2:10-14.
 5. Nakita sa mga mago si Cristo, ug gisimba nila Siya; unya gipasidan-an sila sa Dios sa damgo nga dili gyod sila mobalik ni Herodes, busa namauli sila sa ilang nasod “agi sa laing dalan” (v. 12); sa makita na nato si Cristo, dili na gyod ta molakaw pa sa mao rang dalan, sa dalan sa relihiyon bulag ni Cristo; molakaw gyod hinuon ta sa laing dalan.

III. Nagsidlak ug buhing mga bituon ang matinumanong mga magsusunod ni Cristo, ang mga nisunod ni Cristo nga nagsidlak ug buhing bituon aron mahimong hulad Niya—Dan. 12:3; itandi sa Gen. 22:17:

- A. Nagsunod ang buhing mga bituon sa langitnon, buhi, takdo-sa-panahon, ug dihadihang panan-awon ni Cristo nga sentro ug uniberso sa pamatigayon sa Dios—Buh. 26:16-18; Col. 1:17b, 18b.
- B. Ang buhing mga bituon mao ang mga nagpanalangin sa katawhan sa Dios; labi tang modayeg sa Ginoo alang sa katawhan sa Dios ug mamulong og maayo bahin nila diha sa pagtuo, labi sab natong gibutang ang atong kaugalingon sa pagpanalangin sa Dios—Num. 24:9; Gen. 12:2-3; 22:17.
- C. Nagtagad ang buhing mga bituon sa pulong sa panagna sa Kasulatan “ingon nga sugang naghayag sa ngitngit nga dapit” aron mosubang sa ilang kasingkasing adlaw-adlaw si Cristo nga bituon sa kabugason; kon magtagad ta sa pulong sa Biblia, mosubang Siya sa atong kasingkasing aron mosidlak diha sa kangitngit sa apostasiya diin naa ta karon, sa dili pa ang aktwal nga pagtungha Niya ingon nga bituon sa kabugason—2 Ped. 1:19; Juan 6:63; Bug. 2:28; 22:16; 2 Tim. 4:8:
 - 1. Sa prinsipyo sa bituon sa kabugason, mobangon gyog sayo ang Cristohanon kay ang sayong buntag man ang labing maayong panahon nga mosugat ta sa Ginoo (aron makig-ambitay sa Dios, mag-ampo ug mag-awit, mag-ampo-basa sa Biblia ug sa pagpangalagad, ug moampo sa Ginoo)—A. A. 7:12; Sal. 5:1-3; 57:8-9; 59:16-17; 63:1-8; 90:14; 92:1-2; 108:2-3; 143:8; Exo. 16:21.
 - 2. Sekretong ihatag sa Ginoo ang Iyang Kaugalingon nga bituon sa kabugason sa mga nahigugma Niya ug nagtukaw ug naghulat Niya aron makatilaw sila sa kalunhaw sa Iyang presensya sa Iyang pagbalik human sa dugay nga pagkawala—1 Tes. 5:6; Bug. 2:28; 3:2-3; 16:15.
- D. Nagpahimulos ug napuno ang buhing mga bituon sa Espiritung gipakusgan sa pito-ka-pilo aron himoon silang hilabihan kabuhi ug hilabihan kamasidlakon alang sa pagtukod sa Dios—3:1; 4:5; 5:6.
- E. Ang buhing mga bituon mao ang mga sinugo sa kaiglesiahan, ang mga nagpahimulos ug nagsinati sa pneumaticong Cristo nga Sinugo sa Dios ug lunhawng mensahe gikan sa Dios aron ikapaambit nila ang lunhaw ug naa-karon nga Cristo ngadto sa katawhan sa Dios alang sa panghimatuod ni Jesus—1:16, 20; 2:1; Mal. 3:1-3.
- F. Dunay “hugot gyod nga mga pagbuot sa kasingkasing” ug “dagkong pagsusi sa kasingkasing” ang buhing mga bituon; mga maghihigugma sila sa Dios nga sama sa “mga bituon...gikan sa ilang mga agianan” aron makig-away uban sa Dios batok sa Iyang kaaway aron “masama [sila] sa adlaw / Inigsubang niini sa kakusog niini” ug “magmasanagon sama sa Adlaw sa gingharian sa ilang Amahan”—Huk. 5:15-16, 20, 31; Dan. 11:32; Mat. 13:43.
- G. Ang buhing mga bituon mao ang mga nahadlok ni Jehova ug naminaw sa tingog sa Iyang sulugoon, nga nisalig ni Jehova aron duna silay kahayag samtang naglakaw sa kangitngit—Isa. 50:10-11; Sal. 139:7-12, 23-24:
 - 1. Mag-antos sa kasakit ang mga naghimog kahayag alang sa ilang kaugalingon ug naggawi diha sa kahayag nga ginama nila mismo imbis nga diha sa kahayag sa Dios—Isa. 50:11.
 - 2. Magpasidaan gyod unta kini nato aron maggawi ta diha sa kahayag nga gi-hatag sa Dios, dili sa kahayag nga gihimo nato alang sa atong kaugalingon; “Ari ug manglakaw ta diha sa kahayag ni Jehova”—2:5.
- H. Gihulagwayan ang buhing mga bituon sa mga bituon nga gipahamutang sa ikaupat nga adlaw sa pagpahiuli sa Dios ug sa dugang pang paglalang Niya,

nga niini naghari sila pinaagi sa pagsidlak nila; hain ngani ang pagsidlak, naa didto ang pagbuot aron motubo ang kinabuhi—Gen. 1:14-19:

1. Ang pagsidlak ni Ginoong Jesus didto sa Bukid sa Pagkausab sa Dagway mao ang pag-abot sa gingharian diha sa gahom; kining pagsidlaka sa pagkatinuod mao ang nagbuot nga presensya sa Tulo-usang Dios—Mat. 17:1-8; Mar. 9:1-8.
 2. Ang gingharian sa Dios nga mao ang pagbuot sa Dios, ang paghari sa Dios, lakip ang tanang panalangin ug pagpahimulos niini mao ang pagsidlak ni Ginoong Jesus ug ang pagkaylap ni Ginoong Jesus sa pagsidlak Niya kanato.
 3. Ang gingharian mao ang pagsidlak sa realidad ni Ginoong Jesus; mosidlak ngani Siya kanato ug maanaa ta nianang pagsidlaka, naa ta sa gingharian nga gibuot-an ug giharian sa Dios sa sulod nato aron motubo ta sa kinabuhi.
- I. Sa negatibong bahin, dunay uban nga “naglaag nga mga bituon”—Jud. 12-13:
1. Ang pasumbingay sa naglaag nga mga bituon nagpakita nga ang masalaypong mga magtutudlo, ang mga apostasyanhon, dili lig-ong napasukad diha sa dili mausab nga mga kamatuoran sa langitnong pinadayag; naglibotlibot hinuon sila taliwala sa katawhan sa Dios nga samag mga bituon.
 2. Naglaag nga mga bituon karon ang masalaypong mga apostasyanhon, apan sa kapulihay bilangoon sila sa kadulom sa kangitngitan, nga gitagana na alang nila hangtod sa eternidad.
 3. Bisan kinsang wala manudlo nga ang mga iglesia lokal dili mao ang tumong sa pamatigayon sa Dios kondili ang paagi nga makab-ot ang tumong sa realidad sa Lawas ni Cristo wala makatagbo sa panginahanglan sa pagpangalagad sa Dios karong panahona; bisan kinsang mopugong nato aron dili ta masakot sa kaiglesiahan aron marealidad ang Lawas ni Cristo naglaag man nga bituon; ang tinuod nga mga bituon mao ang mga nagpabalik sa daghan ngadto sa pagkamatarong, ang wala magpasalaag sa mga tawo kondili nagpabalik nila sa hustong dalan.
 4. Dili layo nato karon ang buhing Bituon ug ang buhing mga bituon—naa sila sa mga iglesia lokal ug uban sila sa mga iglesia lokal nga praktikal nga mga pagpadayag sa Lawas ni Cristo (Bug. 1:11, 20); diha sa tanang iglesia lokal dunay pipila ka buhing bituon; mokontak lang gyod ta nila ug makig-uban nila; dad-on ta nila sa dapit nga nahimutangan ni Jesus.
 5. Kaluy-an unta ta sa Ginoo nga kanunay tang maampingan diha sa hustong dalan aron mahinagbo nato ang Ginoo, mosimba ta Niya, ug mohalad sa atong gugma Kaniya; samahon unta tang tanan sa Ginoo sa mga mago, nga nagsunod sa buhing bituon aron makakita ug makahimog bag-ong mga pagkaplag ni Cristo aron mahimong hulad Niya ingon nga buhing mga bituon—itandi sa Efe. 5:8-9; Jer. 15:16a.

MAGPANALANGIN SA KATAWHAN SA DIOS ARON MAPANALANGINAN SA DIOS

“Panalanginan Ko ang magpanalangin nimo, / Ug tunglohon Ko ang motunglo nimo.” — Gen. 12:3a

“Bulahan ang tanang mopanalangin nimo, / Ug tinunglo ang tanang motunglo nimo.” — Num. 24:9b

CWWL, 1978, vol. 1, “Fellowship with the Serving Ones, Volume One,” p. 203:

Sa panan-aw sa Ginoo daotan, hugaw, kanang manaway ta sa mga tigom. Ingnon ka sa Ginoo nga, “Lawas Nako kini. Kinsa man ka? Kinsa may naghatag nimo sa katungod nga mosukod sa tigom sa Akong iglesia?” Manaway na ngani ka sa tigom, gibungkag nimo ang pagkausa. Pananglit wala ganahi ang uban sa imong hunahuna bahin sa maayong tigom. Unsa may imong ikasulti? Dili tingali ko ganahan sa tigom, apan dili gyod ko mangahas sa pagsulti kay nasayod ko nga makapabahin kini...Kinsa man ko nga moingon nga dili ko ganahan sa tigom? Maluluy-on unta tang hayagan sa Ginoo ug ang daghan kaayong hinigugmang igsoon.

Pagtuon-sa-kinabuhi sa Exodo, men. 7, pp. 77-79:

Dunay nahitabo sa usa ka tigom sa pag-ampo didto sa Shanghai sa unang bahin sa mga tuig 1940–1949 nga nakatabang nako nga makakita sa katawhan sa Dios segun sa pagkakita Niya niini. Niadtong tigoma dihay sinati na nga masigka-magbubuhay nga igsoong babaye, nga nasamok sa makaluluoyng kahimtang sa iglesia, nga nituaw sa Ginoo tungod ug alang sa iglesia. Sa pag-ampo niya, nanghupaw ug nag-agulo siya tungod sa makaluluoyng kahimtang sa iglesia. Pagkahuman niyag ampo, nidayeg si Igsoong Nee sa Ginoo ug nagpasalamat Niya nga dili gyod maluyahon o makaluluoy ba ang iglesia, kondili maayo kaayo kanunay. Nakurat ang katigoman. Unya gitabangan mi ni Igsoong Nee nga makasabot sa kahulogan sa panagna ni Balaam kalabot sa mga anak sa Israel. Gisuholan si Balaam ni Balak nga motunglo sa mga anak sa Israel. Apan imbis tunglohon ang katawhan sa Dios, gipanalanginan sila ni Balaam. Si Balaam, nga namulong alang sa Dios, niingon nga, “Wala Siya makakitag kadaotan diha ni Jacob, / O nakakaplag ba Siyag kasamok diha sa Israel” (Num. 23:21). Labot pa, niingon si Balaam sa Numeros 24:5 nga, “Pagkanindot sa imong mga tolda, O Jacob, / Sa imong mga tabernaculo, O Israel!” Matod pa ning mga versiculoha, wala makakita ang Dios og kadaotan o kasamok ba diha sa Israel. Nakakita ra hinuon Siyag kaayo, katahom, ug kaanyag. Ingon niana sab Siya kalabot sa iglesia karon.

Ayaw pag-ingon nga makaluluoy o patay ba ang iglesia. Labi kang moingon niini, labi kang matinunglo. Apan, kon magdayeg ka sa Ginoo alang sa iglesiahanong kinabuhi ug mamulong og maayo bahin niini, mapanalanginan ka sa Dios. Sa tanang mga tuig nga naa ko sa iglesiahanong kinabuhi, wala ko makakitag tawo nga negatibong namulong bahin sa iglesia nga gipanalanginan sa Dios. Natinunglo hinuon ang tanang niingon nga batí, makaluluoy, o patay ba ang iglesia. Napanalanginan gyod ang mga positibong namulong bahin sa iglesia, nga nipahayag nga hiligugmaon ang iglesia ug nga balay kini sa Dios. Dili kini doktrina lang; panghimatuod kini nga mapamatud-an sa mga kasinatian sa daghang balaan.

Usahay kon mahigawad ko sa iglesia ug dili positibog hunahuna bahin niini, pasidan-an ko Ginoo nga naa nako nga magbantay. Magpahinlo dayon ko sa Ginoo, ug mopahayag na pod unsa katahom ang iglesia. Bisag makahatag tingali nakog kasamok ang iglesia, gihigugma gihapon nako kini. Labi kong mamulong ning positibong pamulong, labi kong napanalanginan sa Dios.

Kinsang pulong man bahin sa iglesia ang husto, ang imoha o ang sa Ginoo? Sa eternidad, mapamatud-an nga husto ang pulong sa Ginoo, kay sa eternidad matahom kaayo, mahimayaon, ug labaw man kaayo ang iglesia. Bakak ang tanang pasangil sa kaaway bahin sa iglesia. Ang pag-ingon nga makaluluoy o patay ang

iglesia pagpamulong mag yawan-ong bakak. Bakak ang makitang sitwasyon sa iglesia. Bakak ang pag-ingon nga bugnaw o patay o makaluluoy ang iglesia. Habog ug buhi kaayo ang iglesia. Mapasalamaton ko sa kusganong pulong ni Igsoong Nee bahin sa panagna ni Balaam. Hingpit gyong nag-usab sa akong hunahuna bahin sa kasamtangang kahimtang sa iglesia kadtong pulonga. Sukad nadawat nako kadtong pulonga, lahi na gyod kaayo ang tinan-awan nako sa iglesia.

Ayaw pagtan-aw og mas lalom pa sa tinan-awan sa Ginoo. Matod pa sa pulong ni Balaam sa Numeros, wala makakitag kadaotan ang Ginoo diha ni Jacob. Nan, nganong makakita man ka niini? Mas maalamon o mas makasabot pa ba diay ka kaysa Dios? Nipahayag ang Biblia nga wala makakita ang Ginoo og kasamok diha sa Israel. Apan niingon ka nga nakakita kag kasamok diha sa iglesia. Kinsa may tuohan nimo, ang tinan-awan sa Ginoo o ang imoha? Kon magpareha tag tinan-awan sa Ginoo sa iglesia, maampingan ta nga dili mawad-ag panalangin ug matinunglo. Magmatngon unta tang tanan sa tinagdan nato sa iglesia.